

ԿՈՂՈՊՈՒՏ ԿԸԶԸԼ-ԱԶԻԼՈ ԳՑՈՒՂԻ ՄՈՏ

Թիֆլիսի և Բորչալվի գավառների սահմանագծում, Կըզըլ-Աջիլո գյուղի մոտ, վերջերս տեղի ունեցած ավազակային հարձակման մասին այստեղ մեջ ենք բերում որոշ մանրամասներ կողոպտվածներից մեկի՝ Թիֆլիսի բնակիչ Իվան Ավետիքովի պատմածից:

Պարզվում է, որ Ալայ-բեկ Մուրսակուլովի ավազակախումբը՝ թվով 5 մարդ, երեք օր շարունակ այդ ճանապարհին սպասել է Ղափաղչի և Արախլո գյուղերի նախրապան թաթարների վերադարձին, որոնք դրանից առաջ մորթի ապրանք են տարած եղել Թիֆլիս:

Հենց որ այդ ձիավոր նախրապանները (5 մարդ) երևացել են, ավազակների ուրախությանը վերջ չի եղել, քանի որ երկար սպասելով նրանք կորցրած են եղել իրենց ծրագրածը հաջողությամբ իրագործելու հույսը: Հենց որ նախրապանները մոտեցել են և կանգնեցվել, ավազակներից մեկն սկսել է նրանց հանդիմանել ուշանալու համար, որի պատճառով իրենք՝ ավազակները, ամեն տիպի դժվարություններ, նույնիսկ, քաղց կրելով, ստիպված երեք օր հսկել են նրանց ճանապարհը:

— Մենք,— գոռացել է ավազակներից մեկը,— միշտ հայերին ու վրացիներին ենք կողոպտում, իսկ դուք՝ թաթարներդ, մեզ ոչ մի օգուտ չեք տալիս: Ձեր գյուղերում մեզ անգամ խմելու ջուր չեն տալիս: Ահա այսօր այսքան մարդու բռնել ու չարչարել ենք (ցույց է տվել մյուս կողոպտվածներին) միայն ձեր պատճառով:

Այնուհետև ավազակները խուզարկել են նախրապանների գրպաններն ու հագուստները և մեկի մոտից հանել են 700 ռուբ., մյուսի գրպանից 520 ռուբ., երրորդի գրպանից 50 ռուբ.:

Մյուս բոլոր կողոպտվածները, բացառությամբ վերը հիշատակված Իվան Ավետիքովից և մի տղայից, որի ազգանունն Ավետիքովը չգիտի, եղել են Վաշլովանի, Կողի և Եկատերինենֆելդ գյուղերից, իսկ հիշյալ տղան և Ավետիքովը երկուսն էլ Թիֆլիսից են եղել, ընդ որում առաջինին ուղեկցել է չապարը, որը նույնպես կողոպտվել է: Տղային

ավագակներն ասել են, որ եթե հայրը քաղաքից նրանց չուղարկի 1000 ռուբ., նրան բաց չեն թողնի, բայց տեսնելով, որ տղան շատ է վախեցել, խոստացել են բաց թողնել:

Ավագակներն Ավետիքովից վերցրել են փող և 26 ռուբ. ընդհանուր արժողությամբ զանազան իրեր: Ձիու նոր թամբը խլելով փոխարենը տվել են հին թամբ: Իսկ ձին խոտանել են ու վերադարձրել:

Ճիշտ այդպես են վարվել նրանք նաև մյուս տուժածների հետ. խլել են լավ ձիերն ու իրերը և փոխարենը տվել անպետքները՝ եթե այդպիսիք ունեցել են: Երբեմն ոմանցից խլել են ձիերն ու իրերը և տվել նրանց, ովքեր լաց են եղել և ավելի շատ են կարիք ունեցել ձիերի կամ իրերի: Ի վերջո, բացի, իհարկե, փողից, ավագակները վերցրել են 5 լավ ձի, շատ թամբեր և զանազան մանրունք:

Վաշլովանի գյուղի մի կողոպտված բնակիչ շատ է լաց եղել, որովհետև նրանից վերցրել են նոր չուխան և մեծ տոկոսով պարտք վերցրած 12 ռուբ.: Դա նկատելով, մյուս տուժածները ավագակների պահեստից թոցրել են խեղճի չուխան և իրեն ծածկելով ցնցոտիներով, օգնել են դուրս պրծնել:

Ռատեվանցի մի խանութպան հարմար պահ ընտրելով, ծառայի հետ ձիով արագ հեռացել է, բայց նրա հետևից ընկած ավագակները հասցրել են ծառային բռնել, որի խուրջինի մեջ գտնվել են 35 ռուբ. տիրոջ փողերը:

Ավագակներից մի քանիսը գրագետ են եղել, նախրապանների փողերը խլելուց հետո, ստուգելու համար, կարդացել են նրանց մոտ եղած ստացականները և ըստ այդ փաստաթղթերի պահանջել խուզարկության ժամանակ չհայտնաբերված գումարները:

Ինչպես հայտնի է ավագակները կողոպտվածներին մի ամբողջ օր պահել են Կարանլըխ-դարա ձորակում: Նրանք գերիներին թույլ չեն տվել ծուղակից դուրս գալ, նույնիսկ, ջուր խմելու համար: